

Писателен пумиськон

Бөрдытэк лыдзыны уг луы



Тускутяз Максим Егоров

Михаил Атаманов «Санй. Пилемъёс доразы берто» романэныз тодматэ.

Йоскалык библиотекаын ортчиз писателен, тодосчиен, филология наукаосья докторен Михаил Атамановен пумиськон.

Вераськон мынйз солэн «Кенеш» журналын печатласькем «Санй. Пилемъёс доразы берто» (12+) романэз сярысь.

«Санй. Пилемъёс доразы берто...» роман авторзэ усьтэ историкез, шаерчиез, фольклористэз но Инмарез данъясь адымиез сямен. Та пумиськонэ лыктэм тодосчиос, пöртэм ёросъёсысь вуэм лыдзисъёс, куноос но роман пумысен малпанъёссэс веразы. Тунсыко вал кылыны Михаил Гавриловичлэсь роман бордын ужомез сярысь. Писатель верамъя, туж троссэ романын возматэм учырьёсты со ас синмыныз адзиз ай, куд-огъёссэ анаезлэн, чыжы-выжыосызлэн верамъёсыя гожтйз.

Педагогика наукаосья кандидат, литературовед Любовь Фёдорова верамъя, та романын возматэмын удмурт гуртлэн, 19-тй даурлэн пумысеныз кутскыса, 21-тй даурозь улэм-вылэмез. Автор возматэ огшоры удмурт нылашлэсь — Санйлэсь — Инмар доры сюрессэ, кызы 20-тй даурын ортчем бадзым но көшкемыт, гудырес учырьёс егит нылашлэсь, нылкышнолэсь, песняйлэсь улонзэ тарказы.

— Удмурт литератураын Санйлэн образэз татчыозь герзаськемын вал И. Гавриловичлэн «Санй» лирической поэма-легендаеныз. Отын

валтйсь героиня — беглой, нылкышно бунтарь, картэз дорысь кошке калыклэн эрикез понна нюръяськись Камит беглой сёры. Табере удмурт прозаын воксё мукет Санйлэн образэз кылдйз. М. Атамановлэн Санйез — лачмыт, визьмо, ужась, котькинэн тупаса улыны быгатйсь, Инмарлы оскись. И. Гавриловичлэн Санйез но М. Атамановлэн героиняез ог-огзылэсь зол висьясько, но вань соосты огазеясь но. Кыкназы ик та нылкышноос — чылкыт сюлэмын яратыны быгатйсь адымиос. Одыгез кулытозяз яратйз Камитсэ, нош мукетыз — войнаын бырем Чимайзэ, — шуэ Любовь Петровна.

Юри малпаса озы ним сётйз меда автор виль произведениезлы? Лыдзись

сямен мылкыдъёссэ вераз Удмуртиось культура удысысь дано ужась, Удмурт радиолэн азьвиль кивалтйсьез Раиса Куликова: — Та романэз бөрдытэк лыдзыны уг луы. Гожъясь но бөрдыса гожъяз, дыр, кадь потэ, сокем сюлэм пыртйз поттэмын ваньмыз. Сыче чебер но узыр кылыз. Нокытчы но мөгзоно өвёл, вöй вылтй гылзйса кадь лыдзиськод. Вуныны кутскем кылъёслы но котькуд бамын сноско-валлектон сётэмын. Михаил Гаврилович возматэ визьмо, амало, тыршись удмурт калыкез. Мынам солы йыбырттэме потэ таце роман кылдытэмез понна, со классика луоз, — шуиз Раиса Куликова.

Галина СЕМЁНОВА



Филология наукаосья кандидат, критик Александр Шкляев:

— Романын вань сыче кесэгъёс, кудъёсыз нимысьтыз верос кадь луо, кылсярысь, куке Салимзан ныллы кышнояськыны кылзэ сётйз, нош ачиз армиясь кузпалэн бертйз. Михаил Гаврилович сыче умой тодэ улонзэ, удмурт сяме. М. Атаманов вань улонзэ та романэз гожтыны дасяськиз кадь, потэ мыным. Умой луысал сое нимаз книгаен поттыны.

Гуртысь библиотека

Книгалэсь ческытсэ валано

Дэри ёросысь Ожмос гуртысь библиотекаян 7-тй арзэ ужа Светлана Бектуганова. Лыдзиськисъёс тросгес мед луозы шуыса, пöртэм амалъёсты ужаз кутыны тырше.

Ожмосысь библиотекалэн фондэз бадзым — ог 7 сюрс 700 пала книгаос. Дорысьтызы книга вайисъёс но вань на, пе. Ожмосысь сяна, лыдзиськон юртэ вуыло Ожмос-Пурга, Пальник, Кетул гуртёсын улйсьёс. Пöлазы тросгес нылпиос но арлыдоос. Уноез соос газет-журналъёс дуре пырало, ог 10 мурт виль книгаослэсь вуэмзэс чидатэк вите. Берло дыре тросэз синмаськиллям «Сибириада» сериысь книгаослы. — Бадзым классъёсын дышеткисъёс дорам öжытгес пырало, жаляса верано, тросэз соос лыдзиськонлэсь ческытсэ уг валало, книга лыдзыны дышемын өвёл, — шуэ Светлана Бектуганова.



Тускутяз Валентина Емельянова

Дэри ёросысь Ожмосысь библиотекарь Светлана Бектуганова.

— Алигес мынэстым аниме комиксёсыз юазы, сыче книгаосты, пе, библиотекаяды луысалзы ке,

дорысьтыды ик öм кошкылысалмы. Со книгаосты заказать кари. Ваёзы-а меда, нош вайызы ке,

пинальёс дорам лыктозы-а — шуг вераны.

Озы-а, тазы-а, но гуртысь библиотекарь пинальёслэсь мылкыдзэс ялан бурдъяны тырше. Соос понна тунсыко шудонъёс, кибашлы нылпиослэн ужъёсынызы пичи адзытонъёс радъялля, пöртэм мастер-классъёс ортчыгъя. Нылпиосын ужам сяна, шоро-куспо арлыдем гуртоосты но бордаз кыскыны выре. Кылсярысь, Анайёслэн нуналзылы сйзыса, Ожмос гуртын улйсь, «Бабинское» предприятиян ужась Вера Белявалэн керттэм мунёсыныз «Пичи выжыкыл» адзытон радъяз. Трос калык люкаськылйз удмурт культуралы сйзем ужрадэ но. Библиотекарьлэн ужез тачак, со паланысь адымылы уг адскы ке но. Кылем ар пумын вуж книгаосты списать карон бордын тыршиз, 100 книгазэ фондъёстыз поттыны лэзиллям. Угось чапак сомындагес ик виль книгаос ар куспын вайызы вал. Вильёсыз пöлысь гуртоослы кельшо шаертодонлы

но культуралы сйзем книгаос. Пинал калыклэн зучомемез пумысен но библиотекарьлэн сюлмыз висе. Удмурт произведениеосты, пе, арлыдоос гинэ киязы кутыло.

— Огсыр ужаны тыршисько кадь, сюлмаськонъёсы трос ке но, — шуэ Светлана Петровна. — Ужан интыям туалал курунъёслы тупась компьютере коть луысал ке, дорам тросгес пинальёс пырасалзы, дыр. Библиотекамылэн юртэз но вужгес ни. 2019-тй арын Светлана Бектуганова тодон-валанзэ будэтэм Удмурт кун университетлэн виль библиотекаяз. Отчы вуылэмзэ туннэ но син аяз возе. Вуылэм на Сарапул ёросысь туалал библиотекаосы. Отысь но паймыса бертэм: ужан интыоссы эркынэсь, книга жажыоссы но ужан тйрлыксы вылесъ. Эсьмаса, нылпиос понна нимысьтыз шутэтскон сзрегъёсы но, пе, вань.

Валентина ЕМЕЛЬЯНОВА